



Markus Dünner, Ueli Bleiker ed Elita Florin-Caluori davant ina da las novas tablas nua ch'ins vesa ils resultats da las votaziuns.



La sala dal parlament grischun ha survegni in candelaber e las paraids colurs che s'affan cun il maletg da Carigiet.

Pront per votar electronicamain

Renovaziun da l'edifizi dal cussegl grond terminada

■ (anr/fa) La renovaziun da l'edifizi dal cussegl grond a Cuira cun l'installaziun d'in sistem da votaziun electronic ha custà 2,6 milliuns francs. La sessiun d'avust 2012 vegn il parlament a votar l'emprima giada cun quest nov sistem.

La sessiun da december 2011 aveva il cussegl grond deliberà en occasiun da la debatta davart il preventiv in credit da 2,6 milliuns francs per remplazzar il sistem da microfons e per cumprar in sistem da votaziun electronic. Sunter la sessiun d'avrigl 2012 han las lavurs pudì vegnir prendidas per mauns. «Cunquai ch'il cussegl grond ha salvà sia sessiun extra muros a Samignun han ins già a dis-

posiziun il temp necessari per realisar quistas lavurs», ha ditg il president dal parlament grischun Ueli Bleiker venderdi a chaschun d'ina conferenza da pressa. Ensem cun la vicepresidenta Elita Florin-Caluori e l'architect chantunal Markus Dünner ha el preschentà l'edifizi renovà.

Edifizi stà serrà passa quatter mais

Sunter in temp da renovaziun da bundant quatter mais po il cussegl grond prender en funcziun per l'emprima giada il nov sistem da votaziun electronic durant la sessiun d'avust che cumenza mesemna. «Per che las parlamentarias ed ils

parlamentaris chantunals sappian lavar cun ils novs meds auxiliars tecnicos vegnan els introducids mesemna avantmezdi, avant l'avertura da la sessiun, en las novas apparaturas», ha ditg Markus Dünner.

Votar e s'annunziar per buttun

Gia la sessiun d'avrigl 2012 aveva il cussegl grond adattà ses urden da gestiun: «Fin qua preveseva quel che las deputadas ed ils deputads al cussegl grond stettian si per votar», ha ditg Elita Florin-Caluori, «da nov vegnan els a votar per buttun.» Il resultat vegn alura mussà sin quatter tavlas d'infurmaziun

grondas en la sala dal cussegl grond. «Ultra da quai vegnan ils resultats da las votaziuns finalas stampads sin gli-stas da nums ch'èn accessiblas publicamain», ha ella agiunt. Grazia al nov indriz da microfons na ston las parlamentarias ed ils parlamentaris betg pli s'annunziar per in votum cun in segn dal maun. Er qua pon ellas ed els s'annunziar per buttun tar la presidenta u tar il president dal cussegl grond. Nà dal presidi po alura vegnir dà liber il microfon correspondent.

Novas fanestras e nova illuminaziun

Cun installar il sistem da votaziun e da

microfons cumbinà èn gist er vegnidas remplazzadas ed adattadas las installaziuns electricas sco er sanà l'interiur da la sala dal cussegl grond, adattond ils plazz da lavur. Uschia han ins pudì installar novas fanestras ed ina illuminaziun nova che dovra main energia ed optimar er l'acustica. La sala dal cussegl grond è uss equipada cun la tecnica da projecziun usitada ed ha er in WLAN. Ultra da quai sa preschenta la sala uss en ina nova color adattada al maletg da Carigiet vi da la paraid. Sco che Dünner ha ditg ha la renovaziun pudì vegnir realisada en il rom dal credit permess da 2,6 milliuns francs.



Passa 10 kilometers cabels han ins duvrà sco ch'il specialist Hanspeter Gujan mussa per tut ils novs indrizs electronics.



Las deputadas ed ils deputads han survegni sutgas cun rodas, las qualas vegnan a far damain canera.